

10 Jahr

Kloschterräbe-Schränzer

JUBILITIS

Motto:

Macht aine zäh Jahr Schnäggedänz,
so wird er Jubilar.
Er kriegt s'Diplom und Lorbeerkränz
Und kunnt in d'Zyttig –schklar!

Macht aine zäh Jahr Zwingli-Bibel
Und git's e Kasseschturz-oh jeh!!
so kasch en denn -- kai Mensch nimmt's ibel –
als Jubilar im Keefig gseh.

Au Schteggbrief git's fir Jubilare,
-- d'Wält isch jetz glaub' denn ganz verruggt –
ins Bâloise-Buech, ins wunderbare –
hän si dr Philipp Fasnacht druggt.

Bi s'Geigis isch's jetz uus mit feschte,
s'wird wider grampft bim Jubilar,
vo obe-n-abe deent's vo Keschte
und unde wird dr Pulver rar.

Au d'BeVauBe ka jubiliere,
Si isch rächt ordlig zue de Lyt.
Was duet si umenanderfiehre?
S'zwaihundertfuffzigscht Defyzyt!

Und s'Kuli-Naarrium, die Brieder,
hänn grossi Tier in Zolli gloggt
zuem Bigge und zue hait're Lieder
ans Jubelfescht vom Baizervoggt.

Au Fasnachtsclique fyre Feschter
mit Buschi, Kinder, Frau und Ma
vom Vogel Gryff bis an Sylvester
s'ganz Jahr: Vivat Olympia!!

Und s'Sennehörli in de Trachte
macht gross e Jubileumsrais –
s'isch wägem uswärts ibernachte –
dehaim git's denn dr scheenschi Mais.

Au Fraue fyre Jubilee-e
und wenn's nur im Theater isch,
dert lege drei shtai-alti Fee-e
sit dausig Jahr d'Hiet, uff dr Tisch.

Zuem Fescht, wo d'Uni bald ka fyre.
-- d'Profässer kemme in dr Tracht –
wird dängg vom Zschogge - me duet's schpyre –
dr Jubileums-Brunne gmacht.

E Jubilar, e ganz e digge
het das Jahr zwor versait e bitz,
dä wo-n-is sunscht duet d'Sujet schigge:
He jo, es isch dr Brächbiehl Fritz!

Au mir uff unsrem Bajass-Kaarre,
wo in de Kloschterräbe schränze,
sinn zäh Jahr alt und Jubilare,
me g'sehts am Hoor und an de Ränze.

Am Fasnachtszyschtig machsch dy Jubileumsbsiechli an
d'Ladärne-n-Uusschtellig. Si isch offe vo de morge-n-am
nyeni bis z'obe-n-am elfi.
